

Choi Sung/Sungbong Choi

Rev.P.M.Sangma Pastor Nogorpara Baptist Church

Kan-dike Aganchengani:

Saksa darangni watgalako man·gipa me·a bi·sa Choi Sung ba Sungbong Choi ong·achim¹. Ua Ma·gri pagri wat·brange don·brange galako man·gipa bi·sa ong·oba git ringna namnikanichi uni janggi tanganio dingtanggipa mande ong·baskaaha. Ua 2011 bilsio Korean Got Talent-o dakmesokanio gnigipa ong·ani jaman a·gilsak gimikni mingsingbegipa singer saksa ong·bae da·ona kingking cholon bewalo mamingba ong·siani gri kangal cholgrirangna ka·sae simsak niroke janggi tanggipa South Koreani Aski ong·aha. Mamingba chonbatja, mamingba dalbatja darangon Isolni on·ani dong·a indiba mande Isolni on·aniko mitamrang an·tangtangan u·ijaenga aro mitamara jakkalsretenga, saobara Isolni on·ani ine Isolko mandera·gija an·tangko ong·siatenga. Uni gimin an·ching Sungbong Choini janggi tanganioba adita maikai ma·gri pagrigipa bi·sa jean cartoon box-o tusiaigipa bi·sa da·o a·gilsakni chonggipa Aski rongsa ong·skaaha.

Sungbong Choini A·bachenggipa Janggi Tangani:

Uni ma·gipa aro pagipa uni bilsio 3 ong·mittingon Sungbongko orphanage noko dongalangaha indiba ua uni bilsio 5 ong·on ua orphanageoniba ong·kate re·angaha. Bi·sa indake watbrangale galako man·genchimode mande janggi tangna altuagipa ong·jaani aselo ua neng·nikaoni jakgitel ong·na a·gilsakoni dingtange janggi tangna draataniko man·aia. Ua bilsio 10 ong·aona sorokrangosan dong·aiaha basakoba manderangni bostu galramo tusiaha, basakoba Daejun-ni ramarango tusiaha; badiaba somoirango mande jinmani subuchakram ba ki·chakramrango (Public Toilet) tusiaha. An·tangni janggi tanganina chewing gumrangko palaha aro basakoba dokanrango ringanrangko paltimaha. Badiaba somoirangode manderang ka·sachake breani pal mitamrangde dokesa don·angskaaha.

Dakait dakgiparangba Sungbongko bosturangko palbadinge cha·aniko namnikjachim batesa uamangni namgija dakanio bak ra·china uamang badita chang uko aganbeahaoba uni bak ra·pajaani gimin uko miknengan baksa nidikbeaha. Salsaode uamang ka·o nangeming uko a·briona rimdraengaha aro uko akolo galone a·a dape don·baha. Isolni ka·sabeachi unoniba jokaha. Uarangko chanchiatode namen gisiko dong·topilgija kao nangbeachim, indiba uarangko ua mesokna sikjachim.

Sungbongna Mingsa Mamang Ka·dongani aro Ka·dimeatani:

Ua an·tangni janggi tangani ortoko mamingkon nikjaengachim aro basakobade janggi tangangkuna man·jawahama ine chanchiangpilaha. Indakgipa obostao una mingsa mamang uni janggi tanganio ka·dimeatgipa aro una ka·dongataniko on·gipara git ringanian ong·aha. Gitrang aro uni kattarangsa manderangna bateba sikdikdikgipa janggi tanganio uko ka·dimeatgipa ong·e ka·tongo katchaani baksa tom·tomaniko una on·aha. Jensomoio ua saksan sikdikdik ong·a ua somoirango gitrangko knatimaha aro uan una nambatgipa ripeng ong·aiaha. Changsao ua Chewing gumrangko paloroengachim unon Night Clubni manderangoni saksa git nambee ringaniko knaaha aro uno re·ange nikahaon uni ka·tongo ning·tue uni ka·tongko nang·dikatbeaha aro ugita ong·pana namen uni gisiko sikbeaha. Ua uni gisiko cha·subegipa skaniko chu·sokatna internet-o Music Teacher-ko sandibeaha. Bon·kamao ua opera singer Park Jung-So ingipako grongaha. Jensomoio Park Jung-So ua bi·sani golpoko knaaha bebera·nan am·piljaha unigimin ua an·tangan Sungbong Choi baksa re·ange uni dongramko nieha aro uni agananirang tolgipa ong·ja ine nikahaon uni gisiko namen dong·topiljae ua cholgribegipa bi·sako dakchakna tik ka·e ra·aha.

¹ Rags-to-riches Korean reality Tv star Choi: 'Music was my only friend' www.cnn.com accessed on 27-8-18 at 2:48 pm

Sungbong Choi bostu don·chakgipa box-o tusiengachim jeon maming teng·aniba dong·ja, maming chi aro bara kancha dongjachim. Ding·karioba aro sin·karioba ua pangnan sin·kario sina chake aro ding·kario ding·a chake tusiengachim, sin·kariode Seoul South Korea namen sin·begipa biap ong·a indiba Sungbong maming chol dong·pajae bostu don·chakgipa carton box ningon tusie janggi tangbaaha.

Bangbata somoio jeko man·a ukon cha·e oko gapatrongaiaha una maia toa maia toja maming dingtanganiko uade ma·sipajaha, jeko man·paa oko gapatna nanga ukosan uni u·ipanide ong·aiaha. Ua dokan ge·sao kam ka·napengachim unon saksa me·chikma uko walni Skulo (Night School)-o Daejon bus Station sepango middle skulko poraiatna dakchakanichi Middle Skulko passed ka·aha. Uni jamano ua Elementary School Equivalency Exam-oba chu·sokgipa ong·aha ua schoolni skigiparangba uni git ring·na changaniko namen ma·sirikahachim.

Sungbong Choiko Park Jung-So uni chalaigipa music skulo re·ataha aro una maming tangka paisa grian skie on·aha. Ua namen music-na gisik nang·beaha aro jerangko skiengachim uarangko ua name u·ie ra·na aro uarangko ranta ka·na bimchipaha. Park uko porainaba dakchakaha uni bilsio 16 ong·o ua Arts High Schoolko matchote poraiaha.

Badiaba somoirango Sungbong baksa janggi tang·rimna aro uko re·dilatna altuagipa ong·ja maina ua an·tangni ska aro namnikani gitasan dakronga maina bi·saonin ua nama ba namja ma·gipa pagipa aro jongada noabi darangan una dong·pajae skie agane on·gipa dong·jae jakgitelesa janggi tang·gipa ong·aiaha. Basakoba gipin chatrorang baksa melina man·ja maina ua darangonikoba ka·sae dakchakaniko man·ja batesa badiaba manderang an·tangtangni man·gnini gimin una mamingoba simsaniko man·jaha uarangni giminba ua manderangko namnikja aro nidikaiaha. Da·o ua Park Jung-So-ni ka·sae jakkalaniko man·genoba ua ka·saani kamko niknan chang·jaha aro maidake ka·saskana nangachim uarangko ba chanchisokjaha.

Sungbong Choiko Children's Foundation-o napataha aro Child Fund Korea aro Social Worker Yu Hyun Jeong jako ra·e kamko ka·aha. Ia Governmentni dakchakanichi ua noko nape dong·na cholko man·paaha aro indaken ua Music Schoolo matchote napchina dakchakanikoba man·aha.

Sungbong Choini janggi tangani dingtang dake a·bachengengon Yuni miksonganiara ua tarake an·tangni janggi tanganina cholko dakchinan ong·achim. Unon Park Jung-So-ni nang·nikanide Sungbong Choini chu·sokanirangnasa ong·a indiba kenchaksoaniara ua Children Foundation maibakai uko watgalode aro uko maiba dake ka·o nangatahaode Yu mangni kosakoba namgijarangko dakode maiba namjabatniba ong·genma inerangba chanchisamsoengachim. Maina ua an·tangko so·ote sinaba baditaba chang jotton ka·beaha ine aganmanaha aro anga atchiana bate atchijaon namgenchim ine ua aganrongachim. Park Jung-So uarang pilakon ka·sae man·a dipet uko chu·gimik mandeni janggi tanganiona sokatna simsakbee uko jakkalaha.

Sungbong Choi-ni Aski A·gilsakna Tengsuangani:

Sungbong Choi ia a·gilsako darangba grie pilakni gitan dakgrikbee janggi tangani somoio 2011 bilsio "Korea Got Talent"-ko ong·atgipaona uaba re·angpaaha aro Judgerangoni uni golpoko knae gisiko sudikaniko man·e graptokbeaha. Uamang Korea a·songoba uandake neng·nikan baksa cholgri apgri janggi tanggiparangba dong·aniko nika uamang gisiko duk man·beaha aro an·tangtangde suk maha janggi tangenggon indakgipa kangal bi·sarangko a·songo dong·ako nika uamangni gisiko dong·topiljaha. Sungbong Choi ua dakmesokanina nanggipa lekkao gapatanio (Application form fill up) uni ma·gipa pagipa aro nokdangni column-o bangbang don·aiaha unigimin Judgerangoni saksa uo sing·aha, maina nokdangni gimin gapatanio ua gapatjaha ineming. Unon ua anggo ma·gipaba pagipa gri aro angna darangba dong·ja aro nokdangba gri ine

aganaiaha. Unon banoni maidake janggi tangbaaha ine sing-on uni carton box-o, public toiletrango tusiako aro janggi tanganina doka-rango kam ka-napanirangko agana-haon darangni ka-tongan ua dakmesokanio dringo donggiparangni mikchi rakjaha. Ua Talent Show-o jensomoio ua ku-sik ku-wange sul ru-ringbalbal dake *Italian* git '*Nella Fantasia*' ingipako ring-atahaora uno dong-gipa pilakni mikrononi mikchirangsa ga-aktokaiaha. Uni ring-gipa git dikdiksani gisepon mingsing mingamanirang a-gilsak gimikonan Youtubeni a-sel sokangtokaha aro million 120 manderangni gisepon gisiko dingchaoatako uni ring-gipa git mingsachi a-gilsako aram ning-o donue dong-gipa askini aram gisepon gita teng-subaenga gita teng-subana a-bachengaha. Ua dakmesokanio gnigipasan ong-ahaoba uni mingsing mingamaniara a-gilsak gimikonan gipangaiaha.

Da-ode ua Koreani Aski Rongsa (Star of Korea) ong-e Singapore, New York, aro England ba uandake a-gilsak gimikonan re-angengaha. Uni skanggipa Album '*Slowcoach*' ong-achim aro ua albumko antignion bon-e palnangtokaiaha.

Sungbong Choi Sontolgipa Aski:

Ua a-bachengao ka-dingsmitna mamangba changjachim maina ua maming janggi tangbaanio uandakgipa kusi ba an-tangni ka-tongo katchaani baksa janggi tanganiko u-ijachim.

Ua dambe da-on dipetde bia ka-gijaan dong-kuenga aro ua darang me-chik baksaba grongrikanirangko (dating) aro be-enni skanirangna daarianirang dong-kuja. Changsao ua California-ona git ring-na re-angon uni kattarangko knae bangbatan a-bachengo graptokaha aro program matchotaona kingkingan uni git ring-a gimiknan graptokaiaha. Uni gimin da-ode ua an-tangni git ring-na re-anggiparangchi a-bachengon grapjachina agangrongaiaha. Ua da-o man-a dipet an-tangan duk baksa janggi tanggipa ong-bae duko ga-akgiparangna saoba sae hospitalo sana bananina tangka paisa dong-jaode ba uandake indong neng-nikanirnagko man-giparangna uni amani aro man-paani gita darangnan dakchakatenga.

Senokgipani Agandapani:

Kangal cholgri ong-anio a-gilsako mandeni mamingon pangchakani gri ong-ani aro an-tangni janggikon gamchatnikgijanirangko nikatna man-a. Kangal cholgri inon jemangan cha-anina aro pilak nanganina skime aro ka-dongani gri ong-e janggi tanggiparangko miksonga. Emerson saksa skia man-begipa agana, "Cha-songrango dalbatsranggipa mandena neng-nikaniara kangalbatsranggipan ong-a". Aro Herbert agana "Kangal ong-anide pap ong-ja" (Poverty is no sin). Chanchianiko apalbate aro ning-tubatate Seneca agana, "Bang-gijasan dong-aigipa kangal ong-ja, indiba man-daproroanikosan chanchiaigiparangsang kangal ong-a" (Not he who has little, but he who wishes for more, is poor)².

Kangal inode mamingan dong-gijagipa jedake cha-ani, gana-china, aro nok-jam, iarango mamingan dong-gija neng-skime janggi tanggiparangkon kangal ine agana. Ka-dongani grigipa inode haida kangal ong-ani giminba ong-na man-aia ba dong-oba ua mandeo maming janggi tanganio an-tango mamingkoba chol ong-nikpilgija chanchianirang dong-e una mamingchiba ka-donganiko man-gija dong-giparangan ong-a.

Isol kangalrangna maikai simsaka aro ka-saachim an-ching uni kattarango baditan kangalna chelchakgipa aro patina amgipa ong-a ine nika. Gitrang 68:5 'Isolan uni rongtalgipa dongram, Pagrini pagipa, aro segrirangni bichal ka-gipa ong-a'. Isol pagrigiprangna aro segrigiparangna chelchakgipa aro warachakgipa Pagipa ong-a ine iano rongtale agana-ha. Isolan pilak cha-songrango Pagrigipa aro segrigipa mamingon ka-dongani grigiparang manderangna aro pilak

² Bible CD commentary on quotation

dakanio onia ka·ako man·giparangna chelchakgipa aro dachakgipa ong·a (Git.103:6). Duk man·giparangko aro kangalna kakketgipa bichalko Isol Jihova chu·sokatgipa ong·a ine Daud uni janggi tanganio u·iaha (Git.140:12). A·gilsakni pilak biaprangon man·echagipa a·songrango ba kangal ong·gipa a·songrango bang·bea kangal manderang aro segri pagri janggi duk mikchi baksa janggi tanggiparangan onchepe jakkalanirangko nikna man·enga, Unon an·chingni Isolara kangalna ka·sagipa aro bebeko dakgipa ong·ode maikai iarang ong·enga ine chanchianirangko aro bang·bata ka·dongani grigipa ong·giparang gisiko sing·anirangko nika. Isol dong·ode iandakgipa neng·nikaniko maina nie dong·a haida Isolan dong·jakon ine chanchianirang badiaba kangalni ka·tongona sokbaa. Indiba Isolde a·bachengaonin da·alonaba darangkoba nikchangjaenga.

Uni gimin Isolni kattarangko gisik ra·atengoba bangbata kangal cholgrigiparang Isol dong·ama Isol dong·ode iarang chingna maina ong·enga ine chanchianirangko bang·bea manderangni ka·tongo sing·anirang ong·chongmotenga. Indakgipa chanchianirangko ba sing·anirangko sokbaahaon Isolni kattarangko ka·dongna man·gijanirangan manderangni ka·tongko sason ka·engha. Da·o a·gilsak Isolko manderaana bate a·gilsaknirangko dalbate ra·tokengaha aro uarangchian salanganirangko bang·bate man·tokenga. Gisiktango ‘Ong·ja’ inoba janggi tanganiode uarangko gelna man·gijanirangan gapaiaha. Bangbatan agana, Isolko u·ia, anga gilja re·jaoba ba name janggi tangna man·jaoba ine chanchianirang aro agananirangko nikbata, indiba Isol dong·a ine Uko olakkijaode uara mai orto. Isol Subong Choi gita dakgipa bi·sarangna man·chabegipa Isolni manderangni ka·tongko doktike uamangna ka·sae dakani kamrangko niatna Gisikni mikronrangko o·china angni bi·a.
